

दोरोडारि नोजोरजों बर'फोरनि एम्फौ फिसिनाय : सुंद' सावरायनाय

Karen Basumatary
Bengtol College, Bengtol

बर'फोरा गोदो-गोदाय मोनहास'हायै समनिफ्राइनो आबाद गाहाय हरि। आथिखालसिमबो आबाद मावनायखौनो थांना थानायनि गाहाय राहा लामा महरै खालामना लाबोदों। आबाद मावनायजों लोगोसे सम सम बोथोर लायै बोथोर जिब-जुनार, दावमा-दावसा, एम्फौ-एनला फिसिनाय हुदाखौबो खालामबोफाबाय थार्दोमोन। बेबायदिनो बर' आयजोफोरा बर'नि गोजाम दोरोडारि आदब-खान्थि बाहायनायै आथिखालसिमबो फिसिनाय हाबाखौ मावबोबाय थार्दो। बेफोर फिसिनायनि गेजेरजों बर' आयजोफोरादि जेरावबो आखा फाखा बेखौ रोखा मिथिनो हायो लोगोसे नखरारि जिउ खुंनायाव गोनां जानायफोरखौ एसेब्लाबो सुंथानो हाबोदों। बर' आयजोफोरा गोबां रोखोमनि जिब-जुनार, दावमा-दावसा, एम्फौ-एनला बायदिखौ फिसियो। आंनि बे सावरायनायाव बर'फोरनि दोरोडारि नेम खान्थिजों इन्दि एम्फौ फिसिनायनि सायावल' सावरायनाय जागोन।

इन्दि एम्फौ फिसिनाया गोदो-गोदायनिफ्रायनो सोलिबोनाय बर'फोरनि दोरोडारि आलादा आखु। बर'फोरनि इन्दि एम्फौ फिसिनाय हाबाखौ माल्लानिफ्राय आरो बबे समनिफ्राय फिसिनाय हुदाखौ खालामबोदोंमोन बेखौ बर'नि जारिमिनाबो थों गोथों फोरमायनानै होनो हाया आरो थार फिननायखौबो मोननो गोब्राब। नाथाय बेफोर जेखि जाया मानो जों हमना लानो हायोदि जेब्लानिफ्राय बर'फोरा लाजिनो रेंदोंमोन आरो गावनि गाननाय जोमनायफोरखौ सानखांनो रॉनानै सोद्रोम जानानै मावै-दाडै ज' ज' खौसेयै संसार खुंनानै जाबोनो रेंदोंमोन अब्लानिफ्रायनो बे इन्दि एम्फौ फिसिनाय हुदाखौ मावबोदोंमोन होनना बुंनो हानायनि लामा दं। बेफोर जेखि जाया मानो बै समनिफ्राय नायोब्ला इन्दि एम्फौखौ नख'राव आदार महरै जानो थाखाय लोगोसे नख'राव एफा एनै रंखांथियारि बिथिडाव हेफाजाब मोननो थाखायनो फिसिनाय जायो। गुबुन फारसेथिं इन्दि एम्फौ फिसिनानै नख'रखौ नांगौबादि जौगाखांहोनो हाया थेवब्लाबो बर' आयजोफोरा इन्दि एम्फौ फिसिनानै फिथोबनिफ्राय खुन्दुं लुसे लुनानै सि दानानै आगर आखाय एरनानै गाव गावनि गोनां जानाय गानग्रा जोमग्राफोरखौ गाव गावनो खालामना लाबोदों।

बर'फोरा इन्दि एम्फौ फिसिनो थाखाय गोबां आदब खान्थि बाहायनांगौ जायो। आबादारि बर'फोरा इन्दि एम्फौ फिसिनो थाखाय गोबां जोथोन लानायजों लोगोसे गोबां समबो होनांगौ जायो। जेब्ला बोथोरनि आबाद मावनाय दांनाय खामानिफोरा जोबनानै थाडो एबा गुबुन जेबो खामानि गैया जायो अब्लानो बर' आयजोफोरा इन्दि एम्फौ फिसिनाय समखौ सायख'नानै लायो। सरासनस्रायै बर'फोरा दैजलां बोथोर आरो मेसें बोथोर मोननैबो बोथोरावनो इन्दि एम्फौखौ फिसिनो हायो। नाथाय बांसिनै बर'आयजोफोरा दैजलां बोथोरनि गायनाय-फुनाय खामानिफोरा जोबसाडोब्लासो इन्दि एम्फौखौ बांसिनै फिसिनाय नुनो मोनो। गुबुन फारसेथिं जायफोरा गायनाय फुनाय खामानि दामानिफोरजों जेबो सोमोन्दो गैया बिसोर जायखि जाया समावनो इन्दि एम्फौखौ फिसिनो हायो एबा फिसिनाय जायो। सरासनस्रायै दैजलां बोथोराव इन्दि एम्फौखौ खम बिबानि फिसिनाय जायो। मानोना दैजलां बोथोराव इन्दि एम्फौ फिसिनायाव जोबोर खस्थ'यै फिसिनांगौ जायो। थेवबो जोलै दोननायनि थाखाय बेफोर खस्थ'नि गेजेरजोंब्लाबो एम्फौखौ फिसिनो गोनां जायो। गाहायाव इन्दि एम्फौ फिसिनायनि माखासे खान्थिफोरखौ सावरायनो लानाय जाबाय।

1. एम्फौ जोलै दोननाय :

एम्फौ जोलै दोननाय हाबायानो इन्दि एम्फौ फिसिनायनि बयनिखुइबो सिगांसिन थाखो। एम्फौ फिसिनो थाखाय गिबियावनो एम्फौ जोलै दोननानै लाग्रोनो नांगौ। इन्दि एम्फौ फिसिनो थाखाय फिसिग्रा सुबुडा गावनि न'आव एम्फौ जोलैया गैयाब्लाबो गुबुननिफ्राय लाबोनानै एम्फौ जोलैखौ दोनफैयो। बर'फोरनि इन्दि एम्फौ जोलै दोननायावबो माखासे नेम खान्थि मानिनांगौ एबा मिथिनांगौ जायो। बे जोलै दोननायनि गेजेरजों बर' आयजोफोरनि जौगा थाखोनि दोरोडारि गियानखौनो मिथिनो मोनो।

एम्फौ जोलै दोननो थाखाय गिबियावनो एम्फौ फिथोबफोरखौ जो जोला सिनायनानै लाग्रोनो गोनां जायो। सरासनस्रायै एम्फौ फिथोबखौ सिनायनो थाखाय बर' आयजोफोरनियाव मोनसे खान्थि दंखायो। जेब्लाबो एम्फौ फिथोबा फिसासिन आरो लावज्रिद लावज्रिद महरनि जायो। गुबुन फारसेथिं जो एम्फौ फिथोबफोरा जोला एम्फौ फिथोबनिखुइ एसे गेदेरसिन जायो। बेबायदिनो बबे एम्फौ फिथोबा जोला आरो बबे एम्फौ फिथोबा जो बेखौ गोरलैयैनो मिथिनो हायो। लोगोसेनो जोलै दोननायनि सिगांनो बेफोरखौ सिनायनानै लाग्रोनो नांगौ जायो। मानोना एम्फौ बिदै दैहोनो थाखाय आरो एम्फौ बिबांनि जोनोम होनो थाखाय जो आरो जोला एम्फौनि गोनांथि दं। एम्फौ फिथोबखौ गाहायै मोननै बाहागोआव मोननो हायो। बेफोर बाहागोफोरा जादों मोखां बाहागो आरो खिथु बाहागो। बेखौ सिगां बाहागो आरो उन बाहागो होननाबो बुंनाय जायो। सरासनस्रायै एम्फौ फिथोबनि सिगां एबा मोखां बाहागोआ गुरै जायो। गुबुन फारसेथिं मोखां बाहागोनि रुजुनायाव खिथु एबा उन बाहागोआ गोरसिन जायो। एम्फौ जोलै दोननो थाखाय जो आरो जोला मोननैबो एम्फौनि फिथोबखौ बिजिजों माला बुंखानानै लायो। बे माला सुनायावबो माखासे खान्थि दं। एम्फौ फिथोबफोरखौ जेब्लाबो खिथु एबा उन बाहागोजोंसो सुखांनानै लानाय जायो। मानोना एम्फौ फिथोबनिफ्राय सिखिरिफोरा खर' एबा सिगां बाहागोजोंसो ओंखारो।

एम्फौ फिथोबफोरखौ बिजिजों माला बुंखानायनि उनाव जेखि जाया सान्दुं अखा नाडै जायगायाव आलायनानै दोननाय जायो। नाथाय सान्दुं अखा नाडै जायगायाव दोननाय जायोब्लाबो एफा एनै सोरां मोननाय जायगायाव दोननाय जायो। बेबायदिनो सम आरो बोथोरखौ लानानै फिथोबनिफ्राय सिखिरि ओंखारनायावबो जुदा जुदा जायो। सरासनस्रायै दैज्लां बोथोराव जोलैनो दोननाय एम्फौ फिथोबनिफ्राय 15/20 साननि गेजेरावनो सिखिरि ओंखारो। गुबुन फारसेथिं मेसें बोथोराव 20/25 साननि गेजेरावसो सिखिरिफोरा ओंखारो। बेबायदिनो बर'फोरा माखासे आदब खान्थि बाहायनानै एम्फौ फिथोबखौ जोलै दोननाय जायो।

2. एम्फौ बिदै दैहोनाय :

इन्दि एम्फौ फिसिनायनि मख'जाथाव मोनसे थाखोआ जादों एम्फौ बिदै दैहोनाय। सरासनस्रायै बुंनो थाडोब्ला एम्फौ बिदै दैहोनायानो इन्दि एम्फौ फिसिनायनि नैथि हाबाफारि। बे इन्दि एम्फौ बिदै दैहोनाय हाबायाबो बर' आयजोफोरनि मख'जाथाव एबा जौगा थाखोनि दोरोडारि गियान। जेब्ला जोलै दोननाय फिथोबनिफ्राय सिखिरि जानानै ओंखारो अब्ला सिखिरिफोरखौ बिदै दैहोनो थाखाय जायखि जाया गोजाम सिखौ गुवारै लामनानै न'नि इन्जुराव आलायना दोनो। बे आलायनानै दोननाय सियाव फिथोबनिफ्राय ओंखारनाय सिखिरिफोरखौ लासै लासै हमना लांनानै बाहोना दोननाय जायो। बेबायदिनो सिखिरिफोरखौ बाहोखांनानायनि उनाव साननै सानथामनि गेजेरावनो सिखिरिफोरा बिदै दैनो हानाय गोहोआ जायोब्ला गावसोर बानानै थानाय सियावनो बिदै दैयो। सिखिरिफोरा गावसोरनि दैनो गोनां बिदैखौ दैखाडोब्ला गाव हारसिडैनो बिरना खारो एबा गाव गावसोरनो उराय लाडो। सिखिरिफोरा बिरना खारनायनि उनाव दैनाय बिदैफोरा सियाव सिथाबना थायो। एम्फौ बिदै दैहोनायाव बर'फोरनि गेजेराव मोनसे सुबुं फोथायनाय दं। जुदि फिथोबनिफ्राय सिखिरिफोरा जो गोजा जायोब्ला थामहिनबा जोला गैयाब्ला जोला सिखिरिफोरा गाव हारसिडैनो गुबुन जायगानिफ्राइ बिरबोनानै जो सिखिरिजों लोगो लाफैयो आरो बेबादिनो जो सिखिरिफोरा बिदै दैनो हानाय गोहोआ जायो होननानै फोथायो।

फिथोबनिफ्राय ओंखारनाय सिखिरिफोरा गावसोर बानानै थानाय आलायना दोननाय सिफोराव बिदै दैनानै गालाडो आरो बे सिखिरिफोरा सियाव दैनानै गालांनानाय बिदैफोरखौ थुबुर खालामनानै सियाव थप्ला जुनानै एबा थप्ला बोननानै दोननाय जायो। बिदैफोरखौ थप्ला जुयोब्ला बारा गोरायै जुनाय जाया। सरासनस्रा बिदैफोरा बायदि मैया खैफोदनिफ्राय रैखा मोननाय बायदिल' जुनानै दोननाय जायो। थप्ला जुनानै दोननायावबो सांग्रां जानांगोनदि जाहाथे थप्ला जुनानै दोननाय बिदैफोरा खहा जाया। बेफोरबादि थप्ला जुनानै दोननाय थासारियावनो साननै/सानथाम दोनबाय थायोब्ला बिदैनिफ्राय एम्फौ फिसा जोनोम जानाय गोहोआ जायोब्ला एम्फौ फिसाया जोनोम जायो। बेबायदिनो थप्ला जुनानै दोननाय बिदैनिफ्राय एम्फौ फिसाफोरखौ संग्राय एबा सान्द्रियाव दोननाय जायो।

3. एम्फौ फिसाखौ संग्राय/सान्द्रियाव दोननाय :

बर'फोरनि इन्दि एम्फौ फिसिनायनि मोनसे मख'जाथाव हाबायानो जादों एम्फौ फिसाखौ संग्राय एबा सान्द्रियाव दोननाय। जेब्ला थप्ला जुनानै दोननाय एम्फौ बिदैफोरा साननै-सानथाम दोननायनि उनाव फिसा ओंखारनो हानाय गोहोआ

जानानै बिदैनिक्राय फिसाफोरा ओंखारोब्ला अब्ला बै दिननिक्राय ओंखारनाय एम्फौ फिसाफोरखौ खाथुमनानै दोननाय थप्लाखौ खेंनानै सिंजो जाबजो संग्राय/सान्द्रियाव आलांगायै दोननाय जायो। बेफोरबादि आलांगायै दोननाय जायोब्लाबो गोनां जानाय बायदियै एम्फौ फिसाफोरनि रैखाथिनि थाखाय एफा एनै सम सम खोबनानै दोननायबो जायो।

इन्दि एम्फौ फिसाफोरखौ संग्राय/सान्द्रियाव दोननायावबो माखासे रोंगैथिनि गोनां जाथारो। मानोना एम्फौ फिसाफोरखौ संग्राय एबा सान्द्रियाव दोननानै जानला मोनला एबा गाहायाव दोनला बायबा जाया। बिदि दोनोब्ला माखासे नख'रनि खहा खालामनो हागौ। बिनिखायनो एम्फौ फिसाखौ खहा खालामग्रा जेरै बायदि रोखोमनि मोसोम, ननेमा, एनजर, मावजि, थामफै, एम्बु बायदिफोरा खहा खालामनो हायैबायदि संग्राय एबा सान्द्रिखौ जायखिजाया गोरा दिरुं बाहायनानै बे दिरुंजो संग्राय एबा सान्द्रिनि रुगुडाव खानानै बबेबा न'नि बारान्दा नडाब्ला न'सिनि फेरायफोराव खाखोनानै दोननाय जायो। बेबायदिनो बे संग्राय एबा सान्द्रियाव दोननाय फिसा फिसा एम्फौफोरनो जानो हानाय बायदियै गोरलै गोरलै इन्दि बिलाइफोरखौ गांन्रै गांबासो सि सायावनो होनाय जायो। बेबायदिनो संग्राय एबा सान्द्रियाव सानथाम सानन्रै एबा जेब्लासिम एम्फौ फिसाफोरा मोजाडै थाबायनो रोडा आरो जेब्लासिम मोजाडै आदारखौ जानो हाया अब्लासिम संग्राय सान्द्रियावनो दोनबाय थानाय जायो। जेब्ला एम्फौ फिसाफोरा आदारखौ मोजाडै जानो हानाय जायो आरो मोजाडै मानबायनो रोंनाय जायो अब्लासो दानदायाव दोननाय जायो।

4. एम्फौफोरनो आदार होनायनि आदब-खान्धि :

बर' आयजोफोरा एम्फौफोरनो आदार होनायाव गोदो गोदायनिक्रायनो जोबोर सांग्रां। सरासनसा बर'आयजोफोरा एम्फौनि बैसो जानायखौ लानानै इन्दि बिलाइखौ आदार महरै होनाय जायो। एम्फौफोरा गोरलै हालोदावबा इन्दि बिफानि गोरलै गोरलै बिलाइफोरखौसो होनाय जायो। गेजर थाखोनि एम्फौफोरनो गोरलैबो नंजोबा गोराबो नंजोबा गेजर थाखोनि इन्दि बिलाइफोरखौ होनाय जायो आरो एम्फौफोरा मोनहां मोनहां सम जानायाव रानाय बिलाइफोरखौ होनाय जायो। बैसोखौ नायनानै जुदि एम्फौफोरनो बिलाइनि जगर खालामना होनाय जाया अब्लाना एम्फौफोरनि देरनायाव हेंथा नुजाथिगोन। बिनिखायनो एम्फौफोरनो जा बैसोआव जाबायदि बिलाइ जाहोनांगौ बैफोर बायदि इन्दि बिलाइफोरखौसो बुथुमना होनाया जोबोरैनो गोनांथार।

5. दान्दा खानाय /आलाइनाय :

संग्राय एबा सान्द्रियाव दोननाय एम्फौ फिसाफोरा जेब्ला मोजाडै आदार जानो हायो आरो मोजाडै मानबायनो हानाय जायो अब्लानो बै एम्फौ फिसाफोरखौ दान्दासिम लांनाय जायो। एम्फौ फिसाफोरखौ दान्दायाव दोननो थाखाय थि जखानि औवाखौ हासनानै दान्दा खालामनानै लानाय जायो। लोगोसे दान्दाखौ बसनो हायै गोरा दिरुंफोरजो खानानै लानाय जायो।

दान्दा खानाय एबा आलायनाय हाबाया एम्फौ फिसिनायनि सायाव सोनारो। जुदि एम्फौ फिसिनाया खम बिबानि जायोब्ला खम दान्दा खानानैनो फिसिनो हायो। नाथाय गोबां बिबानि एम्फौ फिसियोब्ला दान्दा खानायाबो थाखो थाखो खाखोनो गोनां जायो। सरासनसायै एम्फौ फिसिनायनि दान्दा खानाय होनोब्ला नांगौ जखानि औवाखौ हासनानै सेर सेराव दिरुंजो खानानै 2 नडाब्ला 3 फुटसो जानाय जानखार जानखार दिरुंजो नांगौ बायदि जखानि खाखोनानै लानाय जायो। बेबायदिनो इन्दि बिफानिक्राय बिलाइखौ खानानै लाबोना थारानि बिजौ बाहागोआव जायखिजाया खानो हानाय गोरा दिरुंजो मुथा मुथायै खानानै लाग्रोनय जायो। उनाव बे इन्दि बिलाइनि मुथाखौ समानै खावनै थुब्ला खालामनानै दान्दायाव दिन्दां आलायनानै दोननाय जायो। बेबायदिनो गासैबो दान्दायाव नांगौबायदियै इन्दि बिलाइनि मुथाफोरखौ दिन्दां आलायनानै दोनखानायनि उनाव एम्फौफोरखौ संग्राय सान्द्रिक्राय बोखारना लाबोनानै बे दिन्दां दोननाय इन्दि बिलाइफोराव हगारनानै होनाय जायो। एम्फौफोरखौ बेफोरबादि दोनोब्ला एम्फौफोरा उदाडैनो थानो हायो आरो एम्फौफोरनि खिनाय खिफोरा हायाव गोग्लैना थायो।

6. एम्फौ मोननाय आरो जालियाव दोननाय :

इन्दि एम्फौफोरखौ दान्दायाव हगारजेननायनि 25 निक्राय 30 सानसोनि उनाव एम्फौफोरा फिथोब थोबनो सम जायो। जेब्ला एम्फौफोरा फिथोब थोबनायनि सम जायो अब्ला इन्दि बिलाइ जानायखौ नागारनानै इन्दि बिलाइ थारानि सायाव फैनानै

गुबुन जायगा नागेरबाय थायो थामहिनबा जेराव-मेराव मानसावला बायनो नाजायो। एम्फौफोरा बेफोरबायदि जायोब्ला एम्फौ मोननायनि समा सौफैबाय होननानै हमनानै लानो हायो एबा एम्फौफोरा बेफोरबायदि जायोब्ला एम्फौ मोननाय एबा गोमोन जानाय होनना बुंनाय जायो। बेबायदिनो एम्फौफोरा सानसेयैनो गासैबो मोनजोबा सानफा एफा मोनलाडो। इन्दि एम्फौफोरनि बयनिखुइबो सिगांसिन मोननाय एम्फौखौ अजा होननानै बुंनाय जायो। बिनि उन उन मोननाय एम्फौफोरखौ थान्दै होनना बुंनाय जायो आरो उनाव गासैबो मोननायफोरखौ बहर होननानै बुंनाय जायो।

इन्दि एम्फौफोरा गोमोन जायोब्ला एबा मोनोब्ला एम्फौफोरनि महरफोरा लासैनो सोलायलाडो। दान्दायाव थानाय समाव इन्दि एम्फौफोरा सरासनसा गुफुर गाबनि जायो नाथाय जेब्ला एम्फौफोरा गोमोन जायो अब्ला एम्फौफोरनि गाबा लासैनो गोमो गाब जालाडो। मोनसे खोथाया थारदि जेब्ला एम्फौफोरा गोमोन जायो अब्ला मोननाय एम्फौफोरखौ दाडोब्ला सब सब सोदोब जायो।

गुबुन फारसेथिं जालि होननानै बुडोब्ला एम्फौ गोमोनखौ दोननो थाखाय एबा फिथोब थोबहोनो थाखाय खालामना लानाय रोखोमसे आयजें। सरासनसायै जालिखौ बर'फोरा मोखोना बिलाइ, थालिर बिलाइ, खान्थाल बिलाइ आरो थाइजौ बिलाइफोरखौ खालामना लानाय नुनो मोनो। बेफोर बिलाइफोरखौ मुथा खानो हानाय बायदि जनो हायै गोरा दिरुं बाहायनानै मुथा खानानै लानाय जायो। बिनि उनाव नांगौ जखानि औवा हासनानै बे औवायाव मुथा खानानै लानाय जालिखौ समानै खावनै बोखावनानै आलायना दोनो। बे आलायना दोननाय जालिफोराव एम्फौ गोमोनफोरखौ फिथोब थोबनो थाखाय हगारनानै होनाय जायो। बेफोरबायदिनो एम्फौफोरा जालियाव दोननाय सानसे हरसेसो सम जायोब्लानो लासैनो फिथोब थोबलाडो। फिथोब थोबनायनि समा सानथाम सानब्रैसो जायोब्ला एम्फौ फिथोबफोरखौ जालिनिफ्राय बोखारनो हानाय जायो।

7. फिथोब खानाय आरो एम्फौ दिहुननाय/जिरनाय :

फिथोब खानाय आरो एम्फौ दिहुननाय एबा जिरनाय खामानिया बर'फोरनि एम्फौ फिसिनायनि जोबथा थाखो एबा खामानि होनना बुंनो हायो। मानोना एम्फौखौ जालिनिफ्राय जेब्ला साननै-सानथामनि उनाव खायो आरो एम्फौ लाथाखौ फिथोबनिफ्राय दिहुननाय जायो अब्ला बिनि उनाव गुबुन मोनसे थाखोसिम बारस्लायलाडा, थोंजों बर'फोरा आदार महरै जानो थाखायनो बाहायनाय जायो।

जालिनिफ्राय एम्फौ फिथोब थोबनायखौ खानायावबो माखासे आदब खान्थि बाहायनांगौ जायो। बेफोर आदब खान्थिखौ बर' आयजोफोरा जोबोर रोंखा राखाथारखा। जालिनिफ्राय एम्फौ फिथोबखौ खानाय समाव बर' आयजोफोरा जोबोर जोथोनै खायो। जाहाथे एम्फौ फिथोबनि खुन्दुंफोरा जेबो खहा जाया। बेबायदिनो फिथोबफोरखौ लासै लासै जालिनिफ्राय खानानै जायखि जाया औवाजों खालामनाय आइजें आइलाफोराव दोननाय जायो। एम्फौ फिथोबखौबो गाहायै मोननै रोखोमै मोननो हायो। बेफोर जादों गुफुर गाबनि आरो जारेद-रेद गाबनि। बिनि अनगायैबो जायगा लायै जायगा गोजा गाबनि फिथोबखौबो नुनो मोननाय जायो। एम्फौ फिथोबनि गाबखौ लानानैबो बर' सुबुं समाजाव फोथायनाय दं। जाय नख'राव एम्फौ फिसिनानै फिथोबा जारेद-रेद जादों बे नख'रहा एम्फौ जाजायो होनना फोथायो।

एम्फौ फिथोबखौ खानायनि साननैसो उनाव जेब्ला एम्फौ लाथाखौ जिरनाय समावबो माखासे दोरोडारि गियानखौ मिथिनांगौ जायो। एम्फौ फिथोबहा उन बाहागो आरो सिगां बाहागो थायो आरो उन बाहागोआ गोरा जायो गुबुन फारसे सिगां फारसे गुरै जायो। एम्फौ फिथोबखौ जिरनो थाखाय गाहायै गुरै बाहागो थामहिनबा खर' एबा सिगां बाहागोजोंसो जिरनाय जायो।

बर'फोरनि दोरोडारि एम्फौ फिसिनाय हुदाया जोबोर गोब्राब जायनि थाखाय दोरोडारि गियान गैयाब्ला सरासनसा सुबुंफोरा बे हाबाखौ मावनो हानाया गोब्राब जायो। बेफोर दोरोडारि गियाननि आंखालनि थाखायनो आथिखालाव बर'फोरनि गेजेराव एम्फौ फिसिनाय हुदाया गोमालांनो हमबाय।

हेफाजाब लानाय बिजाबफोरा :

1. नारजारी, इन्द्रमालती : लाइसिनि बिखायाव इन्द्रमालती।
नारजारी, बिरलां
2. नाज्जी, भबेन : बर'-कछारीनि समाज आरो हारिमु।
3. नारजारी, इन्द्रमालती : मायनाव बरायनाय।